

VP Schmidt u Londonu naglasio potrebu jačanja institucionalnog okvira i unapređenja euroatlantskog puta BiH



Tokom jučerašnje posjete Londonu, visoki predstavnik Christian Schmidt informirao je članove Komiteta za međunarodne odnose i odbranu Doma lordova Parlamenta Velike Britanije o situaciji u Bosni i Hercegovini. Visoki predstavnik je kao prioritet naglasio potrebu da lideri u Bosni i Hercegovini na prvo mjesto stave reforme i napredak na putu evroatlantskih integracija. Također je istaknuo da se mora uspostaviti izborni okvir u kojem se svaki glas broji i poštuje. Visoki predstavnik Schmidt je rekao da je od najvećeg značaja ojačati vladavinu prava i osnažiti državne institucije.

Visoki predstavnik se u Londonu sastao sa Leom Dochertyjem, članom parlamenta i ministrom za Evropu pri Uredu za vanjske poslove, Commonwealth i razvoj (FCDO); Jamesom Heappeyjem, članom parlamenta i ministrom za oružane snage; Victorijom Billing, direktoricom za Evropu pri FCDO; te Osmanom Topčagićem, ambasadorom Bosne i Hercegovine u Ujedinjenom Kraljevstvu.

Tokom ovih razgovora, visoki predstavnik je istaknuo potrebu za punom implementacijom Daytonskog mirovnog sporazuma i

poticanjem zajedničkih napora u borbi protiv kriminala i korupcije. „U najboljem je interesu svih u BiH da pokrenu zemlju naprijed i jačaju njen put evroatlantskih integracija. Jačanje vladavine prava, posebno kroz nadogradnju institucionalnih kapaciteta, ključno je za dugoročnu stabilnost i sigurnost BiH i šire regije“, rekao je visoki predstavnik.

Također je izrazio zahvalnost na kontinuiranoj i iznimnoj podršci Ujedinjenog Kraljevstva Bosni i Hercegovini i njenim građanima, kao i Uredu visokog predstavnika i mandatu visokog predstavnika u skladu sa Dejtonskim sporazumom.